



Adresa: **Ul. Hamdije Čemerlića 39a**  
71000 Sarajevo  
<http://www.voda.ba>

tel. +387 33 726 400  
fax. +387 33 726 414  
e – mail: [info@voda.ba](mailto:info@voda.ba)

Broj: **UP-I/25-3-40-343-5/21**

Datum: **08.09.2021. godine**

«Agencija za vodno područje rijeke Save» Sarajevo rješavajući po zahtjevu Investitora „FAZLA“ d.o.o. Turbe u postupku izdavanja vodne dozvole za ispuštanje tehnoloških otpadnih voda i aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u toku rada kompleksa za rezanje i obradu kamena, sa pratećim objektima i sadržajima izgrađenog u naselju Turbe, općina Travnik na osnovu člana 139. stav (1) tačka 3. i 10. Zakona o vodama („Službene novine Federacije BiH“, broj 70/06) i člana 200. stav (1) Zakona o upravnom postupku („Službene novine Federacije BiH“, broj 2/98 i 48/99), donosi:

### **RJEŠENJE** **o vodnoj dozvoli**

1. Daje se vodna dozvola pravnom licu „FAZLA“ d.o.o. Turbe za ispuštanje tehnoloških otpadnih voda i aktivnosti koje mogu imati specifične uticaje na vode prilikom izvođenja aktivnosti na lokaciji izgrađenog postrojenja za rezanje i obradu kamena, u naselju Turbe, općina Travnik, na k.č. 276/2 i 276/6, Zk. ul. br. 133, K.O. Runjići, općina Travnik.
2. Ova vodna dozvola se odnosi isključivo na aktivnosti i lokaciju definiranih tačkom 1. ovog rješenja i ne oslobađa podnosioca zahtjeva obaveze pribavljanja vodne dozvole za zahvaćanje vode i ispuštanje sanitarnih otpadnih voda, a za čije izdavanje je nadležno Ministarstvo za poljoprivredu, šumarstvo i vodoprivredu Kantona Središnja Bosna u skladu sa članom 139. stav 2. tačka 1. i 2. Zakona o vodama („Službene novine Federacije BiH“ broj 70/06).
3. Rješenje o vodnoj dozvoli je doneseno na osnovu pregleda dokumentacije kojom raspolaže podnosilac zahtjeva, izvršenog uviđaja na predmetnom lokalitetu i utvrđenog činjeničnog stanja na objektu i pod sljedećim uvjetima:
  - 3.1 Da, za vrijeme trajanje ove dozvole, korisnik prilagodi stanje odvodnje oborinskih i tehnoloških voda kao i njihov tretman shodno izrađenoj dokumentaciji „Odvodnja oborinskih i tehnoloških voda za postrojenje FAZLA d.o.o. Turbe“ izrađeno od ovlaštenog poduzeća „STRUKTURA „ d.o.o. Jajce iz 4/2021. godine.
  - 3.2 Da korisnik izgrađenih objekata i instalirane opreme koji se koriste za rezanje i obradu kamena, održava u funkcionalnom stanju i koristi u skladu sa njihovom namjenom i uvjetima iz ove vodne dozvole.
  - 3.3 Da korisnik navedenih objekata za vrijeme trajanja ove dozvole, osigura da se otpadne vode iz postrojenja za rezanje i obradu kamena nesmetano sakupljaju i odvede do objekata predviđenih za tretman otpadnih voda-sustava taložnika i separatora ulja i masti s ispustom u rijeku Lašvu. Ispuštena voda iz separatora masti i ulja mora biti sukladna Uredbi o uvjetima ispuštanja otpadnih voda u prirodne recipijente i sisteme javne kanalizacije («Sl. novine Federacije BiH», broj: 26/20 i 96/20).
  - 3.4 Ukoliko Vlada kantona propiše dodatne (strožije) uvjete za ispuštanje otpadnih voda u površinske vode, od uvjeta definisanih u tabeli 1 Priloga 27. Uredbe o uslovima ispuštanja otpadnih voda u okoliš i sisteme javne kanalizacije, podnosilac zahtjeva je u obavezi iste ispoštovati.
  - 3.5 Da se uspostavi i redovno vrši monitoring prečišćene otpadne vode iz okna za monitoring shodno članu 19. i 20. Uredbe o uslovima ispuštanja otpadnih voda u okoliš i sisteme javne kanalizacije, te pojedinačne i zbirne godišnje izvještaje dostave Agenciji u skladu sa članom 23. iste Uredbe.

Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaju i načinu davanja ovlasti („Službene novine Federacije BiH“, broj 14/10, 14/13 i 26/14).
  - 3.6 Objekte čija je svrha odvođenje i prečišćavanje onečišćenih voda (taložnici, slivnici i rešetke, kanalizacijska mreža, taložnici i separator ulja i masti) treba redovno održavati i koristiti na način koji će osigurati njihovu potpunu ispravnost i funkcionalnost.

- 3.7 Čišćenje strojeva i opreme vršiti isključivo na betonskoj podlozi s izvedenim sustavom odvodnje prema taložnicima odnosno separatoru ulja i masti.
- 3.8 Da se sa opasnim i štetnim materijama postupa savjesno pri skladištenju, transportu i pretovaru kako ne bi došlo do štetnih posljedica po tlo i vode, uslijed prosipanja istih.
- 3.9 Otpad koji nastaje u postupku proizvodnje i drugi nusproizvodi, te mulj iz postrojenja za prečišćavanje otpadnih voda ne smije se odlagati na česticu «vodno dobro», odnosno u vodotoke i na njegove obale.
- 3.10 U cjelokupnom kompleksu koji se koristi za rezanje i obradu kamena i betonskih prefabrikata, zabranjuje se pretakanje nafte i naftnih derivata u bilo kom obliku i namjeni.
- 3.11 S ovlaštenim poduzećem sklopiti ugovor o održavanju, čišćenju i pražnjenju separatora masti i ulja i voditi evidenciju o istom.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
5. U periodu važenja ove dozvole, „FAZLA“ d.o.o. Turbe je dužan provoditi sve mjere i aktivnosti propisane istom.
6. U slučaju izvanrednih situacija, nekontroliranih onečišćenja i drugih sličnih okolnosti, čime bi bio ugrožen kvaliteta podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete trećim licima nadoknaditi.
7. Ukoliko uslijed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima predmetnog objekta obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
8. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
9. Ova vodna dozvola, shodno članu 129. stav 1 Zakona o vodama („Službene novine Federacije BiH“ broj 70/06) se daje sa rokom važenja od pet (5) godine od dana pravosnažnosti ovog rješenja.

### **O b r a z l o ž e n j e**

Investitor, „FAZLA“ d.o.o. Turbe obratio se ovoj Agenciji sa zahtjevom za izdavanje vodne dozvole za ispuštanje tehnoloških otpadnih voda i aktivnosti koje mogu imati specifične uticaje na vode, a odnose se na rezanje i obradu kamena na lokalitetu Turbe, općina Travnik, izrađenom na k.č. 276/2 i 276/6, Zk.ul.br.133, K.O. Runjići, općina Travnik.

Uz zahtjev je dostavljena slijedeća dokumentacija:

- Rješenje o registraciji br. 051-0-RegZ-21-000048 od 14.01.2021. godine izdato od strane Općinskog suda u Travniku;
- Uvjerenje o poreznoj registraciji od 30.12.2020. godine izdato od strane Porezne uprave Novi Travnik;
- Uvjerenje o registraciji / upisu u Jedinostveni registar obveznika indirektnih poreza br. 04/1-17-1-UPJR/1-600-2/21 od 03.02.2021.god.;
- Projekt vodovoda i kanalizacije izrađen od STRUKTURA d.o.o. Jajce, iz 4/2021.;
- Kopija katastarskog plana;
- Zemljišno knjižni izvadak br.133, izdat od općinskog suda u Travniku;
- Posjedovni list br. 1866 izdat od Službe za urbanizam, građenje, katastar i imovinsko pravne poslove općine Travnik;
- Uplatnice administrativne takse;
- Uplatnica po Zaključku o posebnim troškovima.

Nakon pregleda dostavljene dokumentacije, u skladu sa članom 12. stav (5) i (6) Pravilnika o sadržaju, obliku i uvjetima i načinu izdavanja i čuvanja vodnih akata („Službene novine Federacije BiH“, broj 31/15, 55/19 i 41/20), izvršen je uviđaj na terenu i tom prilikom sačinjen Zapisnik broj: UP-I/25-3-40-343-4/21 od 01.08.2021. godine.

Na osnovu uvida u dostavljenu dokumentaciju i izvršenog uviđaja na licu mjesta utvrđeno je sljedeće: Postrojenje za rezanje i obradu kamena nalazi se u naselju Turbe, općina Travnik, na zemljištu označenom kao k.č. 276/2 i 276/6, Zk. ul. br. 133, K.O. Runjići, općina Travnik. Za sve objekte kao i parcele korisnik ima urednu dokumentaciju.

Godišnja proizvodnja odnosno rezanje kamena je oko 10 m<sup>3</sup> i uglavnom se odnosi na izradu nadgrobnih spomenika.

U dvije izgrađene hale obavlja se djelatnost rezanja i obrada kamena u kojima je izgrađen sustav za prikupljanje tehnoloških voda i koje se usmjeravaju na niz taložnika i bazenom za prečišćenu vodu koja se u sustavu recirkulacije koristi u procesu proizvodnje. U slučaju kada crpke ne rade višak vode se preko taložnika skuplja u cijevasti spremnik s prelivom vode u rijeku Lašvu.

Otpad iz taložnika koristi se kao nasipni materijal kod izrade nadgrobnih spomenika.

Sanitarne vode su spojene na lokalnu kanalizaciju s ispuštom u rijeku Lašvu.

Vodoopskrba se vrši iz gradskog vodovoda kojim gospodari JKP „Vodovod i Kanalizacija“ d.o.o. Bašbunar. Na lokalitetu gdje je izrađeno postrojenje za rezanje i obradu kamena ne vrši se pretakanje goriva, jer su svi strojevi na el. energiju a usluge transporta su minimalne.

Predmetna parcela se ne nalazi u zoni vodnog dobra rijeke Lašve.

Za efikasniji tretman otpadnih voda izrađena je dokumentacija „Projekt vodovoda i kanalizacije“ izrađen od STRUKTURA d.o.o. Jajce, iz 4/2021.

Do sada nije vršen monitoring otpadnih voda.

Na osnovu utvrđenog činjeničnog stanja, malog kapacitet proizvodnje i obrade kamena kao i dostavljene dokumentacije, a u svrhu smanjenja negativnih uticaja predmetne aktivnosti na stanje voda i prava na vode dodijeljena drugim korisnicima, podnosiocu zahtjeva su ovim vodnim aktom, u točki 3. dispozitiva rješenja, shodno odredbama člana 116. Zakona o vodama, članova 12. i 13. Pravilnika o sadržaju, obliku, uvjetima i načinu izdavanja i čuvanja vodnih akata («Službene novine Federacije BiH» broj 31/15, 55/19 i 41/20) i Uredbe o uslovima ispuštanja otpadnih voda u okoliš i sisteme javne kanalizacije propisani uvjeti kojih se korisnik pogona ima pridržavati.

Točkom 3. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada («Službene novine Federacije BiH», broj 92/07, 46/09, 79/11 i 88/12) i Odlukom o visini posebnih vodnih naknada («Službene novine Federacije BiH», broj 46/07).

Na osnovu provedenog postupka i utvrđenog činjeničnog stanja, doneseno je rješenje kao u dispozitivu. Podnosilac zahtjeva je na ime izdavanja ovog vodnog akta izvršio uplatu pristojbe iz tar. broj 43. Zakona o federalnim upravnim pristojbama i Tarife federalnih upravnih pristojbi („Službene novine Federacije BiH“, broj 06/98, 8/00, 45/10 i 45/13).

#### **Uputa o pravnom lijeku:**

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva u roku od petnaest dana od dana prijema rješenja.

Žalba se predaje ovom organu neposredno ili preporučenom poštom. Žalba se taksira sa 15,00 KM administrativne takse.

Obrađivač akta:

Marko Barić, dipl.inž.građ.

za – Po ovlaštenju  
Rukovodilac sektora za izdavanje vodnih akata



Haris Ališehović, dipl.inž.građ.

Dostaviti:

- „FAZLA“ d.o.o Turbe, Stanična br. 18, Turbe
- Ⓞ AVP Sava, ISV-vodna knjiga
- Sektor 50
- Sektor 40, arhiva
- Oglasna ploča-AVP Sava